

四庫全書

集部

欽定四庫全書

集部

宋詩鈔卷

四十八至五十二

詳校官中書_臣賈鏐

主事銜_臣徐以坤覆勘

總校官編修_臣王燕緒

校對官中書_臣劉源溥

謄錄監生_臣鄭家屏

欽定四庫全書

宋詩鈔卷四十八

內閣中書舍人吳之振編

張元幹蘆川歸來集鈔

張元幹字仲宗永福人太學上舍歷官至大監所與
遊皆偉人賢士嘗哀其亡友唐惲生詩帖標軸璀璨
如諛達人貴公得氣時人嘉其朋友之義又於亂紙
中得其祖文靖公澤知祖未第時壻於劉氏劉無出

葬於福清元幹求之榛莽中割牲醢酒為文刻石以
傳子孫作幽岩尊祖錄宣政間游定夫楊龜山陳了
翁朱喬年李伯紀洪駒父徐師川呂居仁名賢三十
餘家咸題跋歎美之有蘆川歸來集十餘卷得之書
肆廢帙逸其大半詩止近體六七二卷清新而有法
度蔚然出塵觀其序王承可詩云初從徐東湖指授
句法知淵源有自也

次韻唐彥猷所題顧野王祠與霍子孟廟對

蘭若黃門像相望博陸居衣冠塵亦暗簫鼓祭全疎
草色侵荒逕潮聲過夕墟遺風獨可想弔古一觴餘

過宿趙次張郊居二首

北客多流落東村更寂寥
宵同清夜夢不待故人招
月掛荒園竹霜飛獨木橋
聽雞休起舞且共論天驕
莫歎交游晚相期歲月深
秋來初識面老去要知心
燈火須更僕杯盤取自斟
平生王霸術袖手有微吟

次韻奉和平叔亭林至日之什

雲物果何好客愁今更新坐來江月白興在雪蘿春我
輩且同酌公詩殊出塵莫思淮海上黑幟雜黃巾

花飛

雨暗連兵氣花飛點客愁寓居皆野寺相過只扁舟不
作新塘去還為後柳游盤餐雖杞菊得飽勝椎牛

送江子我歸嚴陵

久客驚秋晚懷歸更送君亂來俱避地老去惜離羣山
閣杯浮菊江城雁度雲行行經釣瀨時事不須聞

亂後

亂後今誰在年來事可傷
雲深懷故里春老尚它鄉
寧復論秦過終當作楚狂
維舟短籬下聊學捕魚郎

返正

諸將爭傳檄羣凶尚阻兵
天旋黃屋正日轉赤墀明
喪亂多妖孽經綸貴老成
鯨鯢終必戮草木已知生

冬夜有懷柯田山人四首

聞說新居好山樊卜築深
藥囊能濟物龜筮少知音
四

海憂黔首中原盡綠林直須期雪屋夜掉去相尋

坐閱干戈擾輸公已定居生涯今易足世態莫嗔渠晷
短全疎客牕晴好對書故山常入夢何日到吾廬

客裏了無況亂來何止貧淹留頻換歲老大更思親泥
飲思田父供糧乏故人自憐歸未得不是白頭新

雅欲賦招隱何堪弔戰場獨看星錯落久立夜蒼芒羽
檄來東越風烟隔下塘安閒隨處有冠蓋莫相望

登垂虹亭二首

一別三吳地重來二十年瘡痍兵火後花石稻梁先山
暗松江雨波吞震澤天扁舟莫浪發蛟鰐正垂涎

熠熠流螢火垂垂飲倒虹行雲吞皎月飛電掃長空壯
觀江邊雨醒人水上風須臾風雨過萬事笑談中

漫興

老答書題嬾貧營口腹忙未能忘壯志遽宵變剛腸晷
短催寒急燈明伴漏長牀頭褚衾在不怕滿簷霜

奉送富修仲赴南昌尉

吏道雖餘事人情要飽諳家風端自守句法有同參南
浦翻雲浪西山滴翠嵐折腰與趨走政恐未能堪

夜宿宗公丈室求詩甚勤為賦五字

林表登層閣秋聲隱暮鐘鴟歸苦竹寺雨閣亂雲峰屢
乞畱新句重來訪舊蹤松門罕車馬似喜老夫逢

次韻晁伯南飲董彥達官舍心遠堂

今夕知何夕真成累十觴爐薰飄月影蜜炬翦花香政
嬾還詩債無從發酒狂故人憐久客舞袖要須長

叔易自三吳歸同赴竹菴荔子之集二首

惜別梅花雨來歸荔子秋江帆成昨夢雲嶠忽重游共
喜身長健寧論久客愁殷勤老居士更為寶峰畱

客去雲俱散山空月正圓不參藤樹句自透竹菴禪骨
法凌烟像家聲鼓瑟篇直須陪叔季急佐中興年

寄錢申伯二首

子去客昭武今懷懷舊遊青山渾在眼白髮暗添頭旅
食今安好歸程儻滯畱谿邊因野步試覓水明樓

一點照今古胷中殊了然不妨為漫吏可但號臞僊丹
荔盟猶在凝香句未傳秋風稍涼冷速辦下灘船

申伯有行色會宿東禪次元韻

真成風雨夜精舍對牀眠去住非無數行藏莫問天十
年瀕瘴海一棹破春烟君自足歸興不妨啼杜鵑

次折樞畱題雪峰韻

軒冕本無意烟霞如有期故人容野老勝踐見新詩誰
辦兼忘世公當急濟時春歸仍送別好在出山遲

次韻范才元中秋不見月韻

不見中秋月長吟五字城浮雲有底急清影可憐生殘
夜四更句故人千里情與君徒悵望天上自分明

次呂居仁見寄韻

老去猶爲客誰人念退居相望千里路賴有數行書白
晝猶堪寄烏牛政憶渠何時聞枉駕竹裏喚行廚

次韻劉希顏感懷

避諂疎毛穎推愁賴索郎坐來春漏促夢去畏途長故

國書題冷新詩齒頰香湖山雖好在歲月已相忘

郭從範示及張安國諸公酬唱輒次嚴韻

登樓乘暇日喚客共澆愁春去花猶發陰濃雨未休和
詩真冷澹得句總風流能遣西隣老殊無陋巷憂

戊辰春二月晦日同栖鸞子送所親過寶積題壁

間

春江因送客雲嶠更登臨精舍經行地征人去住心猿
啼清夢斷花落曉牕陰勝踐成三宿俱來此意深

次韻送友人過山陰郡時夜別于舟中

草草杯盤燦燭光
故人相對水雲鄉
濤江君去訪秦望
正壑我歸為楚狂
活國未逢三折臂
憂時空轉九回腸
絕憐明發成南北
夢寐全無夜太長

喜王性之見過千金村

春來書劄已西東
喜復相逢亂世中
萬事變更唯舌在
三年流落轉途窮
雲收野寺侵廊水
月掛孤帆送客風
剩欲畱君明日住
夜闌難得一樽同

次江子我遷居韻

平生自省宜三黜老去何心望九遷
避地湖山聊復爾脫身兵火想當然
浮家泛宅非無計坎止流行本信緣
猶恐驚濤翻四海直須化鶴作飛仙

次趙次張見遺之什韻

海邊游子日思歸新句勞君更置規
莫問人間多貝錦正如天上有參旗
寄書只欲憑黃耳去路誰能畏赤眉
定與故巢猿鶴老此生無愧北山移

過雲間黃用和新園

繚池剩欲開花徑傍舍先須作草堂雨後不妨頻檢校
客來畱得共徜徉故園怪我歸何晚避地輸君樂未央
待得功名方卜築豈如強健享風光

蘭溪舟中寄蘇粹中

氣吞萬里境中事心老經年江上行三徑已荒無蟻夢
一錢不直有鷗盟雲收遠嶂晚風熟浪打寒灘春水生
鴻雁北飛知我意為傳詩句濮陽城

別綬老

無端流落迫殘年三十南山訪老禪
未契安心了難覓不如同世且隨緣
頻移竹几負寒日旋拾松稍炊晚烟
珍重孤雲出山去東西南北一青天

次江子我聞角韻

夫差故國縈寒水鐵馬南來忽振纓
城上昏鴉爭接翅舟中逐客謹逃名
胡笳怨處風微起濁酒醒時夢易驚
飄泊似聞山寺近真成夜半聽鐘聲

次友人寒食書懷韻二首

往昔升平客大梁
新烟然燭九衢香
車聲馳道內家出
春色禁溝宮柳黃
陵邑祇今稱漢地
衣冠誰復問唐裝
傷心寒食當時事
夢想流鶯下苑牆

孤生投老急菟裘
萬里雲山已勸游
共喜石交逢異縣
更陪綵筆賦春愁
無心俯仰猶多事
與世浮湛已拙謀
冷雨吹花作寒食
三杯軟飽且眠休

訪親于連江因過筠溪叩門循行數其荒翳不治

有懷普現居士口占此章

筠莊主人何未歸溪畔長林穿翠微此去功名時欲至
箇中車馬跡全稀茅茨漏久蝸涎篆籀落畝多蛛網圍
公肯借菴容我老為公朝夕埽柴扉

宮使樞密富丈和篇高妙所謂壓倒元白末句許
予尤非所敢承謹用前韻叙謝

修門一出十經春相業時來自奮身袖手深謀終活國
揮毫佳句且驚人話言每許聞前輩賓客何堪接後塵

待婦櫓槍洗兵馬兩翁玄語記天津

次韻文老史君宗允見贈近體佳什兩篇僕與公
別四十餘年一旦邂逅情著於詞

舊遊蘭若盡英才坐上高談亦壯哉老去語音雖記憶
衆中容貌各驚猜津亭夜雨故人少樽酒燈花鄉信來
茂苑相逢話京洛樓猶喜待春回

冬夜書懷呈富樞

耳聾無用問新聞矯首何妨目作昏癡絕已甘投老境

背馳寧受乞憐恩難陪年少從渠薄賴得春回為我溫
京洛交游頻檢校渡江今有幾人存

次韻趙元功贈李季言之什

赤縣飄零未易逢那知今夕一樽同好招明月共清影
託與白雲行太空懽悅舊遊如隔世蹉跎壯志莫論功
兩公秉燭還相對情話從渠半醉中

次韻元功才友道中見貺因以解嘲

當時勇決徑歸休更有人愚似我不何許置錐寧免累

直須畢娶始無憂
頻遭白眼傷流俗
誰向青門念故侯
客裏題詩相慰藉
羨君椽筆盍螭頭

奉送晁伯南歸金谿

君家諸父多人傑
半是平生親舊間
莫話故園空矯首
相從逆旅足開顏
文元勲業金甌字
昭德風流玉笋班
此去騰驤吐虹氣
何由來伴老夫閒

遊東山二詠次李丞相韻

寒木高蘿幾曲溪
斷碑零落卧荒祠
澄潭想像雲頭湧

懸瀑依稀雨脚垂地軸漫煩龍虎戰天符那得鬼神私
茫茫造物殊難曉要是為霖自有時

畱寄黃檗山妙湛禪師

晨發薌城越數峰我來師出失從容白雲遮日蔽秋寺
青嶂聞猿驚暮鐘世亂可無閒地隱山深偏覺老僧慵
他年芋火談空夜雪屋松牕約過冬

用折樞韻呈李丞相二首

參陪仍許瘦筇支長者登臨敢後期鍾斷白雲飛雨過

月生青嶂夜涼時心知勝地都忘睡喜聽連牀共和詩
蓮社風流增荔子餘生長健更何為

莫問蒲萄出月支不緣瓜棗訪安期輕紅滿地人慵埽
空翠沾衣雨足時松陰晴泉聽落澗蟬嘶晚吹助裁詩
公乎此去歸廊廟無用山中怨鶴為

次錢申伯游東山韻

埽榻開軒走寺宮吾曹終日得從容夕陽初落鰾谿路
雲氣半遮獅子峰試問丹砂回白髮何如瀑布煮枯松

暮年縱有壯心在歸意已勝山色濃

宋詩鈔卷四十八

欽定四庫全書

宋詩鈔卷四十九

內閣中書舍人吳之振編

葉夢得建康集鈔

葉夢得字少蘊吳縣人紹聖四年進士自婺州教授
召為編修官歷祠部郎起居郎翰林學士出知汝州
提舉洞霄宮政和五年起知蔡州移帥潁昌府尋提
舉南京鴻慶宮紹興初起為江東安撫大使兼知建

康府移知福州上章請老仍提舉洞霄致仕而卒贈
檢校少保夢得有總集百卷此集乃知建康時所作
總集中之一集也建康是時值用兵契濶鋒鏑之中
而吟咏蕭散固是詩人之致

赴建康過京口呈劉季高

客路重經黃鵠前故人仍得暫畱連長鎗大劒笑安用
白髮蒼顏空自憐照野已驚橫堆堞蔽江行見下樓船
灞陵醉尉無人識漫對雲峰說去年

時季高再新
城上月觀

送模歸卞山并示僧宗義為余守西巖者三首

自我離山間忽已兩改月飢人不忘食未坐先已說家
僮挾書至驚起慰愁絕推尋到雞犬問訊窮曲折此生

豈多為一壑萬慮滅可能復大錯更鑄八州鐵

江東領
八州

汝歸馬蹄輕初不恨觸熱慙報松竹吾豈成久別

端居探幽奇自謂略已徧昨登西山嶺雄絕昔未見溪

湖莽吞吐雲物紛百變乃知十年閒尚或遺勝踐巢成

輒棄去我豈秋社燕

築南山絕頂亭
基垂成而來

為我課僮僕開闢

盡二面莫言羊腸險徑小煩屢轉杖藜不用扶吾脚猶
爾健

生長在山間從公守蓬戶人言膏粱子麤免汚紈袴官
居無多應暫止復遽去家法恐未傳此心良已素義禪
晚從我似識此間趣西巖鬱嶽岑久斷俗子路聊持山
中節為我主畱務封陞際湖海雲月皆所部

建康舊俗貴重九上已諸曹皆休務祀神登北山
參議馬君獨不出攜詩相過因言石林之勝次

其韻

倦飛歸鳥正思還扣戶聊分半日閒勝事漫同談栗里
佳時休笑負龍山簿書已老無餘力香火朝真有舊班
他日尚期能過我試窮千嶂共追攀

西齋初成解中舊有太湖石數十株因植之庭下
萬壑千巖不易求壺中聊寄小瀛州稍看硤兀雲峰出
便有檀欒桂樹幽絕境自知難遽忘奇蹤爭怪獨能畱
山翁已老猶兒戲漫擬伸眉一散愁

與晁激仲夜話

外家文米到諸郎凜凜辭鋒未可當伴我何辭共戎馬

憐君聊欲濯糟漿

激仲以池州酒正從余辟

殘年落寞風塵際永夜

從容燈燭光祇恐扁舟吾欲去病慵無意簿淮陽

次韻再答激仲

生涯久許捕魚郎鳬雁相追不亂行但近陶廬存菊徑
不辭楚酒醉椒漿交情老柏寒方見妙語靈珠夜有光
回首漸知歸路好已看梅柳動初陽

雨夜與模論中原且起模與徐敦宗遊清涼覽觀
形勢嘉其有志因以勉之

千年石頭城突兀真虎踞蒼茫劫火餘尚復畱故處大
江轉洪濤騰踏不可御空城寂寞潮日暮獨東去登臨
欲弔古俯視極千慮吾兒勇過我蓐食穿沮洳謂言撫
中原未暇論割據功名亦何人我老聊自恕它年報國
心或可借前箸無為笑頽然已飽安用飫

懷西山

西山十畝強高下略不齊嵌空抱奇秀上有凌雲梯架
屋八九間茅簷最巖低所欲面勢好老稚通扶攜密竹
轉修徑老松故成蹊仲冬景氣肅碧草猶萋萋仰視天
宇大四觀渺回溪徐行信足力未畏成顛躋周意各有
適孰云無町畦平生幾濡首末路乃噬臍不作巢幕燕
宵從觸藩羝胡為濫麾鉞坐聽鳴鼓輦外物委蟲臂全
生思馬蹄可能三徑草歸路老更迷

山間每歲正月望梅花正開多與客飲花下今

年郡解獨坐十四夜張暘叔晁激仲相過共話
宣和間事慨然歸不能寐因以寫懷

山頭野梅白玉花月明弄影紛橫斜青天無雲萬峰立
下有三畝幽人家年年春歸不暇省但埽雪徑尋寒葩
老夫已忘少年事燈火豈念更繁華一杯起步徧空谷
破屋歸卧暎朝霞陪都復來亦何有凜凜殺氣浮高牙
重關深鎖夜漏永忽記昨夢翻長嗟景龍門前一月會
金盃賜酒余雄誇神州陸沈近歸我漢節方議通胡沙

金史卷之二十一
卷四十九
天翻地覆那得料忍復更聽漁陽搥

蔡子因相過畱踰月

解作江山一月畱仲文儒雅更風流欲知爵躍心能喜

正愛蟬連語不休築室君方論並舍

子因約同居雪上

歸山我

已辦扁舟交親四海今餘幾萬事傷心付白頭

徐敦濟書報嘗過余石林

繞澗新添數百竿故人書為報平安似聞謾謾山風響

正想陰陰夏簟寒老去不能窮蠹簡歸來便擬挂塵冠

一杯且覓林間約莫枉山王廢舊歡

送沈傳曜

卞峰摩青空東望烏氏敦豈忘宿春糧終媿一欵門邂逅此相遇傾懷得徐論人言解牛刀要使當劇煩未悟清廟器朱絃列壘尊我衰百慮息但念三畝園王師肅西征萬馬先雲屯何力償賜履緬慙羨歸軒寄聲舴艋舟想見浮雁村清冷尚可釣無使雪水渾

偶書為山亭二首

為山亭下小巔岬只欠蕭蕭竹數竿但遣飛流時漱玉
且將歸思為翁寬

微風似與洗庭除石枕蠻藤不負予八尺方牀聊已足
可須仍要讀殘書

次韻程伯禹贈宗室趙朝請

人物相望不並時使君水鑑有真知未論理窟傾三語
只鬪詩壇自一奇擾擾干戈猶戰伐紛紛簿領更喧卑
應須便作高軒過好德何人佐我儀

題晁公耄惠崇溪山

荒林翳宿莽脫木寒無烟不知三間茆中有幾醉眠山
遠尚見雪江空欲吞天歸舟定何許滄波方渺然

觀化堂編校舊書

赫日真能永微風亦自涼故應便北戶何敢厭東牆汲
水聊為戲繙書却未忙平生閒與嬾併覺味兼長

翰墨他生業山林晚歲心那知身已老但覺意增深捉
麈誰能話扶筇可細尋晚來庭鵲喜似恐有歸音

憶朱氏西澗

澗下流泉澗上松清陰盡處有層峰應知六月冰壺外
未許人間得暫逢

憶向中流置竹牀萬錢無處買清涼只今路斷無來客
自撥新醅醉幾場

再任後遣模歸按視石林四首

巖石三年別君恩未許歸從誰尋草徑為我歎荆扉舊
統山千疊新添竹一圍故人如見問端欲挂朝衣

白髮萱堂上孩兒更共懷弄孫那得見將母竟難諧已
絕功名望猶疑出處乖此心終未穩何處復安排

挿架環千軸傳家有舊書展舒慙兒案涼曝闕庭除破
屋方懸漚殘編足蠹魚好須重檢校局鎖莫令疎

細路穿南嶺新松幾許長毋庸馳馬足祇擬轉羊腸更
作高亭好初非亂石妨兩溪渾在眼似欲見帆檣

東園作草堂新成二首

官舍如何有草堂野人熟處自難忘池開月映千山迴

檻靜風生六月涼幽徑也從穿別浦小舟還似過橫塘
深知幕府文書省盡付甘眠亦未妨

密覆荒茆已數重中開別戶更相容苦無公事妨人樂

多有清閒借客慵南浦潮平分贍水

堂前池與潮水通

北山路

近得青松

近栽北山松百本

怪翁歸意何能緩新築高臺見卧

龍

園中不見山因積土作臺遂見蔣山

徐敦立相過

茆齋一曲傍寒灣邂逅終年伴我閒契濶易驚成歲月

追尋空復對江山
暫畱客枕聽疎雨

時久旱
方得雨

遙想吾廬

掩舊闌落莫歸心
誰與話坐談聊為起衰顏

同敦立游蔣山謁寶公塔王荊公墓晚過草堂寺

周顥故宅也

我居在城府再至俄二年
豈無山水心可奈簿領纏今
晨偶乘興適此賓從賢
零雨洗驕陽谷中聽流泉
憑高快遠覽正見江浮天
至人本無心與我常周旋
誰云喚不應汝意自不虔

余自到鎮每雨賜祈
寶公塔未嘗不應

麥隴稍已滋橫

水漲微連佳城倚華表拱木埋貂蟬暮過草堂寺借榻
聊寢眠不復聞怨鶴荒茆但連延歸路踐落日羣峰鬱
相先回風送遠響虛里生晚烟吾廬悵何許東望良慨
然

用前韻送敦立

畏作親友別况復非中年身如三眠蠶已老翻自纏竭
來守江關從事寧獨賢經年兩大入燿火通甘泉石林
豈壺中亦自有一天采薇敢言勤誰與歌勞旋上書苦

祈哀傾寫志已虔坐懷北山巖未見西溪連人言搏風
鵬不及翳葉蟬共攬攜手客可忘曲肱眠首鼠信禿翁
胡為尚遷延子來幸暖熱愧我一飯先清詩似鳴玉想
見藍田烟索去何乃遽臨分重依然

為山亭晚臥

瘦石聊吾伴遙山更爾瞻泉聲分寂歷草色借廉纖玉
粒時能飽霜毛日更添平生疎懶意况與病相兼

戲方仁聲四絕句

戲弄扁舟泊宅村却尋三徑築茆墩雲邊此意真誰解
賸作新詩與細論

水檻新開似浣花傍溪須更作浮槎祇應履費王宏酒
時要清樽對落霞

不惜囊錢信手空荒田却擬望年豐天公可是憐風月
判遣詩人一例窮

盧橘楊梅已及時我歸先自有前期平生不作宣明面
浪愧將軍建鼓旗

仁聲舊居城東汨宅村張志和嘗所游也今徙西
溪作雲茆菴因東岡為小亭號茆墩欲傍溪開
水檻久無資會郡守有饋之酒五十壺不敢飲
亟易之乃克成有田數十畝常苦下潦余居石
林與雲茆南北正相望故及之云

宋詩鈔卷四十九

欽定四庫全書

宋詩鈔卷五十

內閣中書舍人吳之振編

張九成橫浦詩鈔

張九成字子韶開封人徙居錢塘從學于龜山紹興
二年策進士直言者置高等九成遂擢首選授鎮東
軍僉判歷至刑部侍郎秦檜和議不合謫邵州復以
傾附趙鼎落職高宗特予宮觀先是徑山僧宗杲與

善檜諷論其與宗杲謗訕謫南安軍十四年從學者
稱橫浦先生每執書就明倚立庭磚歲久雙趺隱然
寶慶初贈太師崇國公諡文忠九成于經學頗多訓
解然習于異學故議論多偏詩亦多禪悅空悟習氣
癸亥初到嶺下寄汪聖錫

人物苦難得閉眼不敢看孤芳擢荒穢秀色出榛菅懷
我同心友正在天一端文字妙入聖操履到所難美玉
經三澣貞松過凝寒憐我窟庾嶺色慘顏不歡書來每

慰薦苦語餘辛酸不上泰山頂安知天地寬相思暮烟
起片月過前灘

食苦筍

吾鄉苦筍佳出處惟石屋玉肌膩新酥黃衣緣深綠林
深恐人知頭角互出縮烟雨養春姿此物未成熟三月
臘酒香開罇媚幽獨烹庖入盤俎點醬真味足未須五
鼎牛聊稱一囊粟竭來庾嶺下歲月去何速經冬又七
春未分窮途哭今朝好事者惠我生一束頭髭甲爛斑

味惡韻羸俗兒童不慣嘗噉噉驚媼僕老妻念鄉味放
箸淚盈目丈夫志有在何事校口腹呼奴更傾酒一笑
風生谷

有客

春雨止復作閉門無與居童奴告予言有客叩吾廬東
帶出見之頎然一丈夫手攜一尊酒辭氣何晏如謂言
久聞名曾未瞻簪裾天寒宜飲酒一杯聊以娛盤食亦
草草蔬果間溪魚顏色溫勝玉言談貫如珠豈期有道

者而來警我愚酒酣意兩適心閒樂有餘四海元有人
君勿輕荒區

三月晦到大庾

我登超然臺積雨久不止臺下柳成行柳下滿塘水環
塘率喬木照影弄清泚恍如在故鄉西湖古寺裏氣象
極幽深景物盡蒼翠十年勞夢想一夕居眼底獨坐不
能去頽然起深思鐘鳴主人歸燭光何燼煒笑語復移
時夜久余當起歸路夫何如江聲寒玉碎

庚午正月七夜自詠

余性寡所諧平生惟自得談名顯深縮論利面作赤文
不貴雕蟲詩尤惡鉤擿麤豪真所畏機巧非予匹所以
常閉門千載求知識黃卷有可人為之忘寢食亦復愛
山水策杖無與適看雲獨忘歸聽泉常永日內樂萬事
休中虛衆妙入欲以語斯人此事吾無力道喪亦久矣
無言三歎息

課書

汲汲我何事愛此牕日光北門終日開風透軒檻涼貧
病何以療六經真古方榮辱頓爾失太山亦毫芒呼兒
來讀書絃誦驚滿堂仕途有捷徑掩口笑我狂

辛未閏四月即事

閒居喜無事冠櫛每晨興今朝鳩喚夢疑是大雨徵萬
事雖顛沛此兆常可憑須臾到江湖一掃蠻瘴腥雨罷
有何好環江數峰青蛟龍得時橫長堤豁然崩衰老甘
寢寐半夜聞雷聲連岡萬株松漂零一毛輕雨意疑未

已浮浮晚雲蒸咄哉造化兒徒勞竟何成

窮居不擇交賢否那復辨似人輒已喜况復曾半面相
見且寒溫不問風雨變晚來無與遊澄江喜如練攜筇
信步行屈曲隨山轉數日雨不止衝波顙激箭舊雨已
不來今雨誰復見甕頭香滿屋吾計今已辦豈復思故
鄉無事且彊飯

相馬須相骨探水須探源君如識此理知人若神仙可
以千歲下坐照萬古前有時陰求人得意初無言如聞

失一士每食不下咽人才何其尠求一於百千豈獨令
世歟自古皆已然我欲授此法其誰可與傳

十九日雜興

不是南方熱愛此有永日人事斷經過蕭然空一室風
驚牕外竹聲如清廟瑟西塘荷已花北戶棗亦實仕途
非所長進寸輒退尺所以入市朝愁苦甘首疾謫來已
九年底事無憂色山林興甚長湖海情何極

物理情不齊人生各有好所好儻不獲亦各騁奇巧淺

者不及門深者入堂與名利工欺人市朝徒膠膠所得
無幾何舌焦唇亦燥其間狹劣者不售輒復躁亦有操
金珠侯門致私禱葡萄得涼州所求輒復効舐痔或嘗
糞車服夸新好吾唯戒妻奴酒熟宜予告

和施彥執懷姚進道葉先覺韻

西湖十里山春風一杯酒茲興良不淺何日落吾手我
讀君和詩襟期一何厚同生上下宇共閱古今宙死生
何足云餘年付美醑佩印還故鄉衣錦眩春晝一時正

兒嬉千歲墮塵垢所以賢達人中懷元有守試看牕日
中野馬互奔驟區區竟何成尚誇舌在口宿習猶未除
新詩漫懷舊環顧天地間四海惟三友兩老雖未死二
妙已先陪生者豈其巧死者亦非謬君如悟斯契萬事
可懷袖銅錢自如山金印自如斗只今定何間腐骨久
已朽籬菊師淵明庭草悲王冑彼已升層霄此猶鑿戶
牖浩歌君其聆相看都皓首

子集弟寄江蟹

吾鄉十月間海錯賤如土尤思鹽白蟹滿殼紅初吐薦
酒歛空尊侑飯饒如虎別來九年矣食物那可睹蜜烟
瘴雨中滋味更茶苦池魚腥徹骨江魚骨無數每食輒
嘔噦無辭知罪咎新年庚運通此物登盤俎先以供祖
先次以宴賓侶其餘及妻子咀嚼話江浦骨滓不敢擲
念帶烟江雨手足義可量封寄無辭屢

讀東坡謫居三適輒次其韻

旦起理髮

憶昔叨從班入朝大明宮五更催上馬夢裡過萬松想
見天竺山九重吟清風頭垢不暇梳爬搔常靡通今來
幸閒放櫛比宵忽忽清晨解條辮千梳復重重不羨列
禦冠散髮搖風鬢氣舒兩目明頓與離朱同此藥豈易
得快意適相逢再拜復再拜深恩荷天公

午牕坐睡

年老目飛花心化柳生肘萬事元一夢古今復何有六
月苦夜短午晝何其久頽然北牕下竹几休兩手昏昏

不復知酣適如中酒睡鄉日月長椿靈未為壽形存若
蟬蛻質槁如木朽榮辱漫紛紛正夢那復受有夢尚有
思無夢真無垢欲呼李太白醉眠成二叟

夜臥濯足

夏日乏締葛冬來無衾裯况復竄炎荒令人生百憂空
城舞狐狸深林鳴鵲鷗此邦無足戀聊為薪水畱枯枝
煮寒泉大竈聲颼颼老盆深注湯徐以雙髀投沃久意
痛快縶維令脫鞵須臾膏液上兩踝暖氣浮生平苦寒

痺一洗皆已瘳登山不須扶跳梁逐狙猴

秋興

秋意入茅屋杖策登平原落日含西山一川頓明鮮
蕭江上竹漚漚巖下泉我生本閒放胡為此拘拳身世
兩相違於今六十年勇退未為怯銳進豈其賢

半夜驚夢回桐葉紛索索杖藜視天宇雨罷雲收脚清
風拂襟裾片月墮籬落嗟我遊已倦悵此久淹泊豆畦
今已花稻隴行可獲翻思黃卷中古人誰可作田園愛

潛歸葦瓢識顏樂譬彼鷓鴣心平生在叢薄

過報恩

籃輿訪蕭寺烟暝漲春空遠樹樓頭綠殘霞山外紅昏
鐘發林杪人語殷橋東回首都無迹人生真夢中

三月晦城門晚景

雨漲春江浪沄沄日夜奔羣山落雲裏萬壑吼巖根沙
際人呼渡烟中收入村蕭然何處士終日揜柴門

題竹軒

聽說竹軒趣清幽盡此房春禽一聲杳夏簟五更涼落
雪鳴寒玉啼螢泣古簫因君詩意到欲罷不能忘

二月二十四日即事

春來尋勝事此興亦何窮夜雨亂江淥朝花退日紅雷
聲驚嶺北雲氣漲溪東蓑笠衝泥去誰知與我同

即事

幽事晚山色幽齋春雨餘亂紅欹澗水浮綠漲郊墟北
牖迸新筍西園生野蔬槿籬遶茅屋已分老樵漁

三月二十四日出城

數日雨不止今晨晴已還江頭看濁浪牕外見青山白
鷺投前浦輕舟漾遠灘樽中有餘酒一酌注顏顏

次施彥執韻

新詩宛見故人面思入江山氣象雄幾歲不堪青草瘴
今朝還喜鯉魚風高秋木落雁為伴久雨江深吾欲東
他日樽前如把臂莫驚我已白頭翁

客有談嘉祐間事者一客瞪目不應及聞介甫新

事則心目開明珠可怪也聊作詩以紀之

吾道何衰只愴神六經文字變儀秦魏侯酷喜聽新樂
中尉生來好殺人海鳥錯將金奏眩葉公元愛畫龍真
不逢伯樂休驤首忽遇長沮莫問津

次單推韻

七載離家夢亦驚春來又是聽倉庚熟諳世味心如水平
忽見吾人眼尚明青鏡不堪看白髮長鏡何處覓黃精
只思歸去西湖上飽喫東坡玉糝羹

十二月初七日述懷

謫居寂寞歲將闌
几案凝塵酒盞乾
落落雨聲簷外過
愔愔雪意座中寒
孤飛隻影人誰念
萬里長途心自安
世事悠悠君莫問
雪芽初碾試嘗看

宋詩鈔卷五十

欽定四庫全書

宋詩鈔卷五十一

內閣中書舍人吳之振編

汪藻浮溪集鈔

汪藻字彥章德興人入太學登進士歷江西提舉徽
宗製君臣慶會閣詩藻所和羣臣莫及傳稱於時時
胡伸亦以文名人為語曰江左二寶胡伸汪藻遷著
作郎忤王黼與祠寓晉陵八年欽宗遷起居舍人高

宗歷擢中書給事侍講直學士院一時詔令多出其
手拜翰林學士以所御白團扇親書紫詰仍兼綰黃
麻似六經十字以賜除龍圖閣奏纂三朝日歷進顯
謨閣學士知徽州論落職居永州卒在晉陵時徐俯
洪炎洪芻自負無所屈見藻詩於僧壁惜曰我輩人
也詣舍上謁而去藻歎曰撫鬚琢句騷人墨客不平
之鳴耳烏足尚哉詩高華有骨興寄深遠有浮溪集
六十卷失傳此選本文粹所存也

桃源行

祖龍門外神傳壁方士猶言仙可得東行欲與羨門親
咫尺蓬萊滄海隔那知平地有青春只屬尋常避世人
關中日月空萬古花下山川長一身中原別後無消息
聞說胡塵因感昔誰教晉鼎判東西却愧秦城限南北
人間萬事念可憐此地當時亦偶然何事區區漢天子
種桃辛苦望長年

過吳明叟新居

誰開大屋沈沈者門外垂楊拂車馬主人四十持節歸
高臥綠陰啼鳥下冥冥一徑傍花入忽有青池照深夏
魚吹落日知鏡淨荷受微風看珠瀉夫君少有湖海氣
欲駟馬鯨無地跨故將能事驚世人坐向雲端差萬瓦
稍培幽桂出牕底時放青山來竹罇人言此興極不淺
天遣公忙那肯赦要須更作輞川圖他日思歸聊對畫
同張昌時宿高明寺

幽臥不知覺牕懸寒日初矧伊夜來雨谿聲到吾廬故

人挽我出忽枉天際書躋險敢自休青山轉籃輿相逢
竹間寺共擷園中蔬殘僧誰在亡奄忽十載餘茗果話
疇昔新晴報鐘魚東雷亦已鳴百草茗穎舒奈何與之
子齒髮日夜疎眷此不能發牽衣更踟躕明朝各回首
世事將焉如

次高郵軍

小雨靜林麓鷓鴣相應鳴移舟漾清深薄晚荷氣生歸
鳥盡雙去潛魚時一驚菰蒲若無人渺渺炊烟橫艇子

檝迎我攜魚薦南烹月出殊未高疎林隱微明依沒會
有處斗掛天邊城

阻風雨辟邪渡寄王仲成

渡頭急雨鳴森木木杪顛風飛大屋沒腰寒水稻生芽
滿眼青泥車折軸山行值雨舟值風窮愁日日煩天公
不如歸卧澗壑底世事不埽春烟空別君兩年重此別
喜君宵次渾冰雪擬將身作賈胡雷無奈事如空鳥滅
挽我不回君怒嗔交情把玩轉清新相隨百里還相見

只有西山似故人

避地函亭野步

今日幸無雨天空出遙岑行行不知疲遂至春江潯汲
路轉籬落人家在桑陰平疇漲清波隴麥如人深溝畎
戲鳬鶩新蒲映浮沈我生本樵漁對此諧初心風物豈
不好悲來自難任胡塵暗中原四海如驚禽黃屋狩萬
里兩宮隔辰參龍移螻螳窺月晦蟾蜍侵宇宙有傾覆
茲游豈嶮嶮銷憂賴濁醪太息誰能斟

庚午歲屏居零陵七月二十日以門揜候蟲秋為
韻賦五首

幽人獨夜時潮落西川根渡口櫓聲急一江烟雨昏城
頭短長更不寐聽譙門趺坐數千息焚香待朝暾

暑退潦亦收瀟湘淨如染時觀自跳魚衝破青琬琰纖
纖初弦月不受薄雲掩近村應漸寒已有鴉數點

人生幾聰明日夜隙駒驟纔經花信風又過麥秋候吾
非金石堅與世相邂逅胡為聞鐘鳴更歷路傍堦

家山在何許渺渺彭蠡東人來數月程衣敝補道中昨
宵青燈花似墜釵頭蟲兒飢女沈綿歲晚書未通

人言間濶者一日如三秋孤臣昔放逐七見天星周早

洿高門地姓名記前旒如何天難星不照湘南州

天星
周一

作寒
暑周

次韻向君受感秋

且欲相隨苜蓿盤不須多問沐猴冠菊花有意浮杯酒
桐葉無聲下井欄千里江山漁笛晚十年燈火客氈寒

男兒幾許功名事，華髮催人不少寬。

向侯拄笏意千里，肯為俗彈頭上冠。何時盛之青瑣闥，
妙語付以烏絲欄。日邊人去鴈行斷，江上秋高楓葉寒。
向來叔度儻公是一見，使我窮愁寬。

晚發吳城山

風掃陽侯雪陣平，雨催摩詰畫圖成。氣吞浦溆重林盡，
秋著江湖去鳥明。厚祿故人無一字，長年三老伴餘生。
會須滿意開懷抱，到眼廬山不世情。

過臨平

一別九霄路風烟長滿衣已成身老大無復世輕肥天
濶鳥雙下山寒人獨歸曉來何似雨春水半巖扉
睡起涼生岸鉤簾坐小牕麥風能起柁梅雨不鳴江往
事心長折歸途影自雙依然蒲柳地人老故先降

書寧川驛壁

過眼空花一餉休坐狂猶得佐名州雖遭灑吏嗤韓子
却喜溪神識柳侯盡日野田行櫓楫有時雲嶠聽鉤輅

會將新濯滄浪足踏遍千巖萬壑秋

宿鄴侯鎮

當時踏月此長亭
髻似河堤柳色青
今日重來堤樹老
一簪華髮戴寒星

微涼初破候蟲秋
露草螢光已不流
搔首與誰論往事
星河無語下城頭

龜山上方

度險逢幽處憑誰寫壯懷
連甍樓絕壁孤塔表長淮
地

本吳楓接山今禹績皆潮聲從殷寺竹影自翻塔木杪
朱欄出城坳雪浪埋乾坤迷枉渚霧雨泄陰崖丹葉經
寒在蒼洲向晚佳魚龍宵聽唳猿鳥晝窺齋月滿蟾珠
實霜清磬石諧僧盂收柏子樵徑埽松釵左宦書無鴈
南烹菜有鮭風烟欺短髮雲水信殘骸竟作何鄉老虛
慚素尚乖江湖今在眼歸合辦青鞋

醉別李高侍郎

疇昔追隨翰墨場功名今日愧劉郎英姿合上凌烟閣

巧譖曾遭偃月堂雙漿又乘清夜去一樽聊發少年狂
歸來却共燈花語騎省看成滿鏡霜

漫興

晨起翛然曳杖行一簾疎雨作秋清老來歲月能多少
看得栽花結子成

燕子年年入戶飛向人無是亦無非來春强健還相見
送汝將雛又一歸

北牕

睡起無一事怡然盼庭柯綠陰微缺處最得南颺多

已酉亂後寄常州使君姪

汾水遊仍遠瑤池宴未歸航遷新廟主矢及近臣衣代
馬窺天塹邊烽斷日畿百年還海地回首忽成非

古鏡行

我有辟邪鏡得之咸陽宮其陰為天池一母將九龍旁
書負圖字土蝕如旋蟲絨以馭雞珍妙極倖之工請言
照遠近十里秋毫空豈不鑒脂澤所貴肝膽通問誰為

此器太古非人功客聞重歎息意欲窺靈蹤高臺不辭
倚恐客難稱客繩窮匣半啟四室來悲風日車當晝留
羞澁如頑銅森然髮上指凜若臨霜鋒我還撫客手此
豈世寶同渾淚兩無言掩鏡聲囊中

蔡天任韻

修廊過午夕陰合蝴蝶滿庭春草長呼兒更捲簾數尺
要放晚晴升屋梁

宋詩鈔卷五十一

欽定四庫全書

宋詩鈔卷五十二

內閣中書舍人吳之振編

范浚香溪集鈔

范浚字茂明婺之蘭江人紹興中舉賢良方正昆弟
多居廬仕竟以秦檜當國抗節不起隱於香溪因稱
香溪先生著書明道多本於經學朱子取其心箴於
孟子集註中繇是重於儒林金仁山謂其集近亡此

本為其從子元卿所輯而陳巖肖弁序者為香溪集

雜興五首

雉驕有擅澤雞雄亦專栖乘人肆桀傲未異雉與雞虛
張盡客氣不知墮危機雉驕或登俎雞雄亦為犧嗟爾
桀傲子不戒將安之

荆梟昔見惡去楚將巢吳妖音不知草吳豈荆人殊梟
能戒煩古勿復輕嗚呼雖荆亦容爾何必他邦居

高蟬蔭嘉木未省蟪蛄危勇蟲一何愚不顧黃雀飢癡

凝挾彈子已復露霑衣世事無不然古今同一悲

鵲噪得歡喜鳥鳴得憎嗔鳥鵲自有口噪鳴何預人鳥
飛聲啞啞鵲飛聲嘖嘖凡鳥從紛紛未用置肝鬲

彭亨著冠猪踉蹌上車鶴皇家一清明此輩束高閣龍
變雜鵲驚庶位已參錯少安真可待四海得耕鑿我亦
幸豐年從容一丘壑

題八馬圖

何年畫工擲毛錐貌此八馬姿權奇青絲絡頭十二蹄

調柔意態行愉怡五馬放浪無維羈或齷或望仍迴嘶
一牧牽鞵一牧騎製度髣髴唐巾衣不知此馬生何時
昔周穆王遠遊嬉駕跨八駿驅東西高升崑崙躡瑤池
騶駼驥義勞飛馳日走萬里無停驂興元唐家危累綦
百千僅脫朱泚圍黃屋進狩懷光追八馬入谷七馬疲
筋攣肉綻行人悲兩者資世皆顛羸虛名何有千載垂
空得傳記流歌詩未知此馬間猶夷牧垆不受鞭箠威
不踣險遠安無危泉甘草薦足自肥安用號駿稱雲騅

嗟哉畫意誰能知

送春曲

春光春光勸汝一杯酒我能為春作高歌未解春能聽
歌否春歸有底急落盡桃花紅園溪漠漠野陰靜兔葵
燕麥空搖風風光幾何時背我忽如客殘絲欲斷感春
心語燕勞勞上簾額我有惜芳意一春憐物華春來雪
裏索梅笑春去悵望飛楊花春歸知復來奈此斷年別
搖楊三月暮天愁鴟鴞一聲芳草歇歌竟我亦醉一棹

舫船空明年待春花樹下放歌擎酒相迎逢

同伯通端杲姪效盧全體

一春癡癖門長扃兩耳不聞鶡鴒聲不知東南風掃盡
紅紫英行行點檢桃李徑但見樹子青冥冥門前水流
渠照灼須眉清科斗遊其間腳股各已生渠旁草鬱鬱
草底蚯蚓鳴韻如抽繭絲幽咽得我聽念此瑣細物隨
時變音形黃河亦鯉或點額老驥塞默長羈纓嗟嗟世
路真難行

六笑

我笑支道林遠移買山書巢由古達士不聞買山居我
笑賀知章欲乞鑑湖水嚴陵釣清江何曾問天子我笑
陶靖節自祭真忘情胡為托青鳥乃欲長年齡我笑王
無功琴外無所欲當其戀五斗乃獨不知足我笑杜子
美夙昔具扁舟老大意轉拙欲伴習池遊我笑韓退之
不取萬乘相三黜竟不去觸事得讒謗客言莫漫笑古
人笑人未必不受嗔螳螂襲蟬雀在後只恐有人還笑

卷五十二
君迴頭生愧不能語嘲評從今吞不吐譽竟非榮亦何
為訕周譏禹終無取

讀揚子雲傳

老不曉事揚子雲綴文譏訶堅逐貧班生曲筆甚假借
謂不戚戚元非真草玄欲作後人計投閣自迷身不利
王涯筮中好其書寧復逆知甘露事蠅聲紫色欺昏童
義士遠引如冥鴻胡為顛眩尚執戟美新屈首稱臣雄
崕山沃野蹲鴟大拓落不歸良已過近危竟似井梅瓶

虛作反騷嗤楚些詭情懷祿遭嘲評但用筆墨垂聲名
文章要亦千古事久矣法言今正行

讀王建射虎行

我讀射虎行慷慨興長歎官差射虎得虎難山下遠立
常空還惜留猛虎著山裏射殺顧恐終身閒有如邊將
圖偷安遵養時晦容其姦翻愁努力盡高鳥良弓挂壁
無由彎君不見劉臣容高千里留賊自資媒富貴恐賊
盡誅身不利坐令屈律裹頭人橫暴九州狂螫噬嗟嗟忠

臣心不移受刀摩頸甘如飴紛紛血刀勇不顧一死未
謝君王知官軍壯氣凌熊羆敵人不滅寧家為相公誓
欲平淮西慨言賊在歸無期霍公裴公今已矣我吟射
虎徒歔歔

理喻

郵亭羈客寒無氈夜懷家山情惘然燈前坐感雨蕭瑟
浩歎達曉愁無眠鄰翁不出蓬茨裏聽雨聽風心似水
黃昏鼻息已雷鳴往往簷喧不經耳愁霖一種聲紛紛

鄰翁不聞羈客聞是中轉物有妙理起予暗契漆園旨

凌霄花

栽松待成陰種漆擬作器人皆笑艱拙往往後得利君
看植凌霄百尺蔓柔翠新花鬱煌煌照日吐妍媚風霜
忽搖落大木亦凋瘁視爾託根生枯莖無殘蒂先榮疾
蕭瑟物理固難恃凌霄亟芳華衰歇亦容易

寄題鄭亨仲可友亭

鄭君坐交窮結柳窮不去無朋長獨立老大荒村住荒

村少人迹取友惟西山當應愛山標可望不可攀牽蘿
架風亭截薛揖高調修簷入危碧阮眼坐相照嗟今輕
薄子對面生九疑寧如友真山貞質終無移憐君意超
超愧我勞勿勿未共結交心漫負心脾骨

暮春病起絕句

老去長閒百不營推書習靜更真清西窗日角籬篩動
時有飛蟲撲紙聲

浦江華藏寺如勝上人欲募施者開田佐僧供以

長老皎公書來求予詩作二十韻奉勉

浮圖謝朋親屏跡藏岩幽多規脫徭賦豈必皆禪流自
言佛遺經墾土為愆尤不耕徒穀腹何異鼠雀偷告之
勿浮食當須力鋤耰前修舉歛事千載垂風猷奈何啞
羊僧百語不領頭皎公老禪伯雅慕吾孔周其徒有如
勝用意非常儔欲開千畦田更辦兩具牛率彼枯木衆
躬耕食其秋釋門有添丁乃翁坐無憂與國助耘耔疲
眊庶其瘳此志良足嘉感之歎綢繆昔聞白黑衆十萬

俱清修鳩金置千畝給供無時休于今豈無人勝也當
尋求長途觸隆冬一衲寒颼颼朱門立雪久歡喜無生
愁作詩勸勇往以俟歲晚收

三月廿六日夜同端臣端杲姪觀異書效李長吉
體

楊花亂落青春暮燕拂簾旌向人語縹壺買酒洗春愁
迴風落日簷花舞赫䟽斷爛千載書青燈照字驚蟬魚
冬烘先生時自哂安用盤盂學田蚡

狂泉

昔有大荒國水以狂泉名國人皆飲泉狂顛率無寧一
者自穿汲乃獨能常醒國人既皆狂反見不狂驚顧謂
不狂人無乃鬼物憑不然是狂疾救療當痊輕施針灼
炷艾膚肉無全平而彼不狂者被虐楚不勝賁然走泉
所酌飲不敢停既飲即亦狂萬慮皆迷冥其狂與衆一
衆始歡相傾世事今亦然嗟哉感詩鳴安得跨鵬背獨
往遊天溟寄謝彼狂子酌泉吾不能

次韻茂永兄首夏新晴

燕落雨知節，鳩鳴天欲晴。
行雲飛斷碧，斜日漏微明。
筍上竹三徑，苗肥田一成。
野人知得飽，索酒坐班荆。

頌茂安兄秀野亭

山作屏風雲作籬，岩峩亭子俯連漪。
絕知此地風光好，直為主人心跡奇。
側塞亂花紅被徑，檀欒高竹翠緣陂。
惠連自喜陪幽賞，判却歸時倒接羆。

歲暮喜晴

晴山喜見曉巔岼笑出蓬門不暇冠風掃斷雲齊萬弩
日融殘雪上三竿早黃楊柳漏春信晚翠枕把凌歲寒
從此林芳入幽賞凍醪新壓味甘酸

課畦丁灌園

連筒隔竹度流泉約束畦丁灌小園拔薤自須還種白
刈葵輒莫苦傷根瓜疇准擬狸頭大草徑隄防馬齒繁
努力荷鋤當給酒無令菜把乏朝昏

春雪晚晴出西村

步履尋春犯雪泥
村南村北鶻鳩啼
墮梅殘白猶明
樹着柳暗黃初映
堤風景快晴雲擘
絮江天未暮日懸
規最憐碧漲侵沙
尾更傍橫橋一杖
藜

送周西美主簿之任祁門

君向祁山去修程
幾日期江天梅子
雨驛路橘花時
知迨循陔養寧辭
糾邑卑美才無不
適鸞翮豈棲遲

次韻端臣姪七夕

萬古東西隔女牛
停梭期會豈悠悠
蝦蟇輪破青天暮

烏鵲橋橫碧漢秋
莫放癡兒懽徹曙
且容老子強登樓
舉瓢更取天漿酌
一洗胸中萬斛愁

張生夜載酒相過

夜卷一鉤簾衣寒覺
露霑未驚風割面
且看月磨鎌
玉枕鵝兒酒花瀕
虎子鹽張公雞黍
舊歡笑了無嫌



宋詩鈔卷五十二